

當直官負于義禁府本月初三日夜一更西方有赤氣狀甚殊常人皆見而驚駭而當直官負不為登臺候察故領監事啓請治罪○弘文館上劄請遇灾修省 上嘉納之○時毛都督軍兵遍滿西路禍及鷄犬朝廷恐有意外之變請令伴使李尚吉懇諭毛將令除出其不合戰用者入送登州從之○日暈兩珥暈上有冠色內赤外青白氣一道起自艮方圜天而指南方良久乃滅夜一更東方巽方西方有氣如火光四更南方有氣如火光○癸亥夜三更巽方有氣如火光四更五更艮方巽方坤方有氣如火光○甲子夜木星犯軒轅大星○乙丑 上晝講大學于文政殿○丙寅 上晝講大學于文政殿○諫院啓曰凡臺諫受耳目之寄國家秘密之事宜無不與聞而近來凡軍國大小刑獄之事全不聞知雖欲隨事糾劾亦不可得請令注書撮要書送于兩司城上所如有慢不舉行者從重懲治從之又啓曰新歲省覲雖出於情禮之不可已而承旨史官未入之處或有族屬私謁之弊納侮之漸不可不防如有敢行干謁者摘發治罪 上荅曰族親雖令入侍有何納侮之失乎親親之道固不可廢也又啓曰統制使具仁皇為子弟營造家舍於鶯島至茲於御史書啓中所當恭俟朝廷處置而乃敢偃然狀啓飾辭自明有若與御史爭辨者然其縱恣無忌